

Här Fernand Etgen
President vun der Chamber

Lëtzebuerg, den 27. Januar 2023

Här President,

Esou wéi den Artikel 80 vum Chambersreglement et virgesäit, bieden mir Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

De Service de Prévention vun der Police hält scho säit laangem Kueren an de Schoulen vir zum Thema Drogen opzeklären. Och wier eng Etude vum MENJE ënnerholl ginn, déi der Police hier Aarbecht an deem Kontext evaluéiert huet, déi eisen Informatiounen no positiv ausgefall ass.

Elo wieren eisen Informatiounen no Ännerungen vum MENJE virgesinn wat d'Konzept vun der Drogepreventioun an de Schoulen ugeet. Deemno géif de konventionéierte Centre National de Prévention des Addictions (CNAPA) eng Formatioun fir Enseignanten aus dem Cycle 4.2 an och vir VISO-Proffen ausschaffen. Dëst Personal géif dann am Fondamental an am Secondaire Kueren iwwert Addictiounen/Drogen halen. Dëst hätt als Konsequenz datt d'Police aplatzt vun e puer Stonnen nëmme nach jeeweils 50 Minutten an de Schoulen agéieren dierf. Och géifen dës Kueren fakultativ ginn. D'Police dierft iwwerdeems hier Kueren net méi halen wéi se dat bis elo all déi Joren gemaach huet mee se dierft just nach iwwert Drogegesetz schwätzen.

An deem Kontext wollte mir folgend Froen un den Här Minister stellen:


- Kann d'Regierung bestätegen datt d'Preventiounskueren vun der Police zum Thema Drogen an de Schoulen néi Konditiounen operluecht kruten an datt CNAPA elo eng Formatioun ausschafft, mam Ziel datt d'Enseignant'en elo d'Kueren zu dësem Thema halen ?
- Kann d'Regierung confirméieren datt d'Police hire Programm geännert krut an nëmme nach dierf iwwert Drogegesetz an de Schoule schwätzen ?
- Ass et richtig datt d'Police laut dem neien Konzept, dat tëscht dem MENJE an dem CNAPA opgeschafft ginn ass, mol net méi dierf op Froen vun de Schüler zum Thema Drogen äntweren ?

- Stëmmt et dass eng Evaluatioun vum MENJE zu der Police hiren Kueren zum Thema Drogen gemaach ginn ass ?
 - Wa jo, aus wéi engem Grond ass des Etude net public gemaach ginn?
 - Wat ass d'Resultat vun der Etude ? Kann d'Regierung bestätegen datt dës positiv ausgefall ass ?
 - Wann deem esou ass, kann d'Regierung eis de Grond nennen wiesou d'Police dann net méi dierf esou weiderfueren wéi se dat bis elo gemaach huet ?
- Wëssend datt d'Personal vum Service de Prévention vun der Police duerch hier Aarbecht um Terrain e spezifescht Wëssen zum Thema Drogen besetzten, wier et net vun Virdeel, dësen méi Spillraum ze loosse wat Kueren an de Schoulen ugeet ?
- Stëmmt et dass dës Kueren net obligatoresch sinn, weder fir den Fondamental nach fir den Secondaire ?
 - Wann deem esou ass, riskéieren mir duerch deen Ëmstand, dat et Schoulen gin wou keng Police méi eng Preventioun mécht ?
- Mengt d'Regierung net och datt an deem Fall d'Vernetzung tëscht Police a Gemengen, Schoulen, Sepas'en an Direktiounen riskéiert vernoléisseg ze ginn ?

Här President, mir bieden Iech, eisen déifste Respekt unzehuelen.



Martine Hansen



Marc Lies



Diane Adehm

Deputéiert



**Äntwert vum Här Minister fir Educatioun, Kanner a Jugend, Claude Meisch, op d'parlamentaresch Fro
Nr. 7522 vun den honorabelen Députéierten Martine Hansen, Marc Lies an Diane Adehm**

Den Educatiounsministère (MENJE) huet dem Centre national de prévention des addictions (CNAPA) an dem Service de Coordination de la Recherche et de l'Innovation pédagogiques et technologiques (SCRIPT) den Optrag ginn, e kohärente Programm mat Cannabismodullen am Schoulcurriculum ze entwéckelen, mat deem d'Schülerinnen an d'Schüler iwwer d'Gefore vum Cannabiskonsum informéiert a sensibiliséiert ginn. Dës Cannabismodule sinn obligatoresch a gi systematesch ugebueden am Cycle 4.2, op 6^e an op 3^e, mat jeeweils sechs Stonne pro Module am Kader vum Cours *Vie et Société* respektiv de *Sciences naturelles*. Am Kontext vun der Regulariséierung vum Cannabis gëtt den Akzent spezifesch op d'Substanz vum Cannabis gesat, fir datt all Kanner a Jonker a Bezuch op d'Risiko vum Cannabis sensibiliséiert ginn.

Ad 1)

Aktuell ginn d'Cannabismodullen, wéi uewe beschriwwen, vum MENJE a SCRIPT, an Zesummenaarbecht mam CNAPA ausgeschafft. Am drëtten Trimester wäerten se an enger Rei Pilotschoule getest ginn, fir dann vun der Rentrée 2023-2024 un an alle Schoulen unzelafen. Den Educatiounsministère wäert der Police net virschreiwen wéi si hier Aarbecht soll maachen.

Ad 2) - 6)

Nee, et kann net confirméiert ginn, datt d'Police hire Programm geännert krut; dat entsprécht net der Volonté politique vun dëser Regierung an et läit och net am Kompetenzberäich vum Educatiounsministère esou e Schratt ze ënnerhuelen.

Et sief ze bemierken, datt et u sech ni e fixe Police-Programm an de Schoulen gouf, ma just sporadesch Interventiounen a verschidde Schoulen. Déi nei ausgeschaffte Cannabismodule sinn, wéi schonn erwänt, obligatoresch, woubäi d'Schoulen op d'Offer vun der Police fakultativ kënnen zréckgräifen.

Ech gesinn net firwat déi gutt Vernetzung a Fro gestallt soll ginn an dësem Beräich wou d'Schoul méi maache wëll a kloer hir Verantwortung iwwerhëlt.

Lëtzebuerg, de 15. Mäerz 2023

De Minister fir Educatioun,
Kanner a Jugend

(s.) Claude MEISCH